

E ALOFA LE ATUA
I ANA FANAU

O lenei savali ua faamoemoe mo le Au Paia o Aso e Gata Ai o e o loo avea ma faafitauli le tosina atu i le itupa tutusa ma o nisi taimi e lagona ai le lotovaivai ae o loo naunau moni e ola i se olaga e fiafia i ai lo tatou Tama o i le Lagi.

O oe o se atalii po o se afafine o le Atua, ma e pa'i atu o matou lagona moni ia te oe i le mafanafana ma le alofa. E ui i ou tosinaga i le itupa tutusa o loo i ai nei, ae mafai lava ona e fiafia i lenei olaga, e tau atu ai i se olaga mama, faatinoina se auaunaga aoga i le Ekalesia, ma olioli ai i le faaaumeaina atoatoa faatasi ma le Au Paia, ma oo atu ai lava i le mauaina o faamanuiaga o le ola faavavau.

Na fofogaina e le perofeta o Nifae i le Tusi a Mamona o matou lagona uma ina ua ia faailoa mai faapea ou te le "iloa le uiga o mea uma." Ae sa ia molimau, "Ua ou iloa e alofa le [Atua] i ana fanau" (1 Nifae 11:17). E moni lava e alofa le Atua i Ana fanau uma. Ae peitai, e tele fesili, e aofia ai nisi o fesili e faatatau i le tosina atu i le itupa tutusa, e ao ona faatalia se tali i le lumanai, i le isi olaga. Ae ua faaalua mai e le Atua, ni upu moni faigofie e le masuia e taialaina ai i tatou. E alofa o Ia i Ana fanau uma, ma ona e alofa o Ia ia te oe, o lea e mafai ai ona e faatuatuaina o Ia.


O Lou Faasinomaga ma le Gafatia

O oe o se atalii po o se afafine faapelepele o le Atua. E le gata Na te silafia lou igoa; Na te silafiaina lava oe. O Lona alofa mo oe e tupito. Sa e nofo i Lona afioaga ae te le'i fanau mai i lenei lalolagi. E le mafai ona e manatuaina lou sootaga i le muai olaga ma Ia, ae Na te manatuaina. E ui e faia e Ana fanau i nisi o taimi mea e faanoanoa ai o Ia, ae alofa pea o Ia ia i latou.

Afai e te iloa po o ai oe ma e maua le lagona to'a i le mautinoa lea e alofa le Atua ia te oe, e mafai ona sili atu ona e malamalama i le mea o loo Ia finagalo ai mo oe. E finagalo o Ia ina ia e mauaina faamanuiaga uma o le ola faavavau. O le ola faavavau o lona uiga e sili atu nai lo se olaga umi po o le le muta. Ina ia mauaina le ola faavavau o lona uiga o le avefaapei o le Tama Faalelagi, ia ola faapei o Ia, ma maua se atoatoaga o le olioli. E mafai ona e maua le ola faavavau pe afai e te usitai i tulafono lava ia e tasi e pei o le Atua ma faia mea Na te faia.

O Lee Fuafuaga o le Fiafia

Ua saunia e le Atua le ata o le faa-
olataga, po o le fuafuaga o le fia-
fia, ina ia fesoasoani ia te oe ia maua
faamanuiaga o le ola faavavau. O lenei
fuafuaga o loo faataatia mai i tusitusiga
paia; e le mafai e alii ma tamaitai ona
toe tusia ina ia faafetaui i o latou
manaoga. E na o le Atua lava ia e tuu-
ina mai le tau i o le ola faavavau. O nisi
o faamanuiaga silisili o loo folafolaina
mai i le fuafuaga, e aofia ai le ola faava-
vau, ma e le o faamoemoe mo se fiafia
puupuu. O le faavavau e umi, ae o le
faaletino e puupuu. A o e faavaeina au
faaiuga i mataupu faavae e faavavau
nai lo luitau po o manaoga faalelalo-
lagi, e mafai ona e maua le “filemu i
lenei olaga, ma le olaga faavavau i le lalolagi a sau” (MFF 59:23).



O nei faamanuiaga e faavae i luga o le usiusitai i mataupu faa-
vae e faavavau. O le taua o aiga o se tasi lea o nei mataupu faa-
vae. O le lagi o loo faavaeina i aiga, lea e moomia ai se alii ma se
tamaitai o e faaaogaina o la mana o le foafoaga i totonu o tuaoi
ia na faatuina e le Alii. O mafutaga a itupa tutusa e le ogatasi ma
lenei fuafuaga. A aunoa ma se tane ma se ava semanu e leai se
aiga faavavau ma e leai foi se avanoa e avea ai faapei o le Tama
Faalelagi.

I nisi o tulaga, e tolopo ai e se tagata le faaipoipoga ona e le o
tosina atu i le taimi nei i se tasi o le isi itupa. E ui i le toatele o
le Au Paia o Aso e Gata Ai na faatoilaloina le tosina atu i le itu-
pa tutusa i le olaga faaletino e ala i taumafaiga taitoatasi, o le
faatinoga o le faatuatua, ma le faalagolago i le mana gafatia o

le Togiola, ae o isi e le o mafai ona saoloto mai lenei luitau i lenei olaga. Ae peitai, o le fuafuaga atoatoa a lo tatou Tama o i le Lagi o loo aofia ai aiaiga mo tagata taitoatasi o e saili ina ia tausia Ana poloaiga ae o e, e le ona o so latou sese, ua latou le maua ai se faaipoipoga faavavau i le olaga faitino. A o tatou mulimuli i le fuafuaga a le Tama Faalelagi, o o tatou tino, lagona, ma manaoga o le a faaatoatoaina i le isi olaga ina ia mafai e fanau uma a le Atua ona maua le olioli i se aiga e aofia ai se tane, se ava, ma fanau.

O tosinaga i le itupa tutusa e aofia ai lagona loloto o le faaga-eetia, fegalegaleai, ma faaletino. E mananao uma lava fanau a le Tama Faalelagi ina ia alolofa atu ma alofagiaina, e aofia ai le toatele o e matutua o e ua nofo taitoatasi mo le tele o mafuaaga eseese. Ua faamautinoa mai e le Atua i Lana fanau, e aofia ai i latou o loo tosina atu nei i ni tagata o le itupa tutusa, e faapea o o latou naunautaiga amiotonu o le a matuai faamalieina i le ala a le Atua lava ia ma e tusa i Lona lava taimi.

Pulea o le Tagata Lava Ia

Ina ia agavaa mo faamanuiaga o le fuafuaga a lo tatou Tama Faalelagi, na auina mai ai i tatou taitoatasi i lenei lalolagi mo se vaitaimi faataitai, lea tatou te feagai ai ma le tele o faaosoosoga ma luitau. O nisi o nei luitau e o mai faatasi ma o tatou tino faaletino. Talu ai tatou te le'i mauaina ni tino faaletino a o le'i oo i lenei olaga, e ao ai ona tatou aoao ina ia ola ma o latou vaivaiga ma malamalama i o latou faailoilo, uunaiga, ma manaoga. Ma e tatau ona tatou aoao pea e fai atu "leai." O lenei puleaina o le tagata lava ia o le tino faaletino e taua tele aua o le a tatou mauaina nei tino, i le tulaga atoatoa, i le isi olaga.

E paia o tatou tino; o nisi taimi e faatatau i ai i tusitusiga paia o "malumalu o le Atua." O le toatele o tagata e tosina atu i le itupa tutusa e faaaloaloga le paia o o latou tino ma faatulagaga a le Atua ua faatutuina—e faapea o feusuaiga e ao ona faatinoina "e na o le va lava o le alii ma le tamaitai ua faaipoipoina faaletulafono o se tane ma le ava" ("O le Aiga: O Se Folafolaga i le Lalolagi," *Liahona*, Oke. 1998, 24). O olaga o nei tagata e matagofie i lo tatou Tama o i le Lagi. Ae peitai, o nisi, ua sopoia lenei tuaoi ma ua lolo atu i amioga le mama. O le faananau i tuinanau faaletino e le faatagaina ai le ola le mama e soo se tasi.

O le fiala moni e faalagolago tele lea i le faailoaina atu o uunaiga faaletino. O nei uunaiga e mavae ese atu pe afai e ausia manaoga faalelagona sili ona taua—e pei o le manao e fegalegaleai ma isi ma auauna atu i ai. O le fiala moni e maua mai i le pulea o le tagata lava ia, faaaloalo o le tagata ia te ia lava, ma le taitaiga tonu i le olaga. E maua mai se molimau o aoaoga faavae moni—e aofia ai po o ai oe ma le tagata e mafai ona e oo i ai—ma mai le ola e tusa ai ma le fuafuaga o le fiala a le Atua.

O le toatele o tagata o loo i ai tosinaga i le itupa tutusa o loo i ai ni molimau malolosi o le talalelei, ma o lea, e le gaioi ai

e tusa ma na tosinaga. O tosinaga lava ia e le avea ai oe ma se tagata e le agavaa. Afai e te aloese mai mafauauga ma gaoioiga le mama, e te le o solitulafono e tusa lava pe e te lagonaina se tosinaga faapena. Ua saunoa mai le Au Peresitene Sili, "E i ai se eseesega i le va o mafauauga ma lagona le mama ma le auai i soo se amioga le mama o feusuaiga ma le isi itupa po o feusu-aiga ma le itupa lava e tasi" (tusi, Nov. 14, 1991).

O lenei mataupu faavae e faatatau i fanau uma a le Atua, aua ua ia faailoa mai o soo se sootaga faalefeusuaiga i fafo o le faa-ipoipoga e le taliaina. E tofu tagata uma ma faaosoosoga, ae o se tasi o faamoemoega o le olaga faitino o le aoao lea ina ia faa-toilaloina faaosoosoga. Na matagofie le faauigaina e Peresitene Tavita O. MaKei le faaleagaga "o le malamalama lea i lou manu-malo ia te oe lava" (i le Conference Report, Oke. 1969, 8). O nei faaosoosoga, lea e tele lava ina le valaauliaina, e mafai ona malolosi, ae le mafai lava ona malolosi atu ina ia aveesea ai lo tatou saolotoga e filifili ai. Na saunoa Elder Dallin H. Oaks, "E tofu uma i tatou ma ni lagona tatou te le'i filifiliaina, ae o le talalelei a Iesu Keriso ua aoaoina i tatou o loo ia i tatou pea le mana tatou te tete ma faatonutonuina ai o tatou lagona (pe a manaomia) ma ia mautinoa latou te le taitaiina atu i tatou i ni manatu faafiafia e le talafeagai po o le faia o ni amioga tausala-ina" ("Tosina Atu i Tagata o le Ituaiga Lava e Tasi," *Liahona*, Mati. 1996, 15). E vave lava ona mavae ese atu ia mafauauga le tatau pe afai e te suitulagaina i ni manatu faagaetia ma lelei.

I lau sailiga mo le puleaina o lou lava tagata, ia manatua le taua o le amiotonu taitoatasi e faapea foi i le lautele. Na aioi mai Peresitene Gordon B. Hinckley: "O a tatou amioga i nofoaga faitele e tatau ona lelei ina ia le mafai ona faitioina. E sili atu ona taua o a tatou amioga i nofoaga patino. E tatau ona manino le tulaga ua faatonuina e le Alii. E le mafai ona tatou faalolololo ai i le agasala, e le tatau foi ona tatou taumafai e



faauiufi a tatou agasala” (i le Conference Report, Ape. 2002, 62–63; po o le *Liahona*, Iulai 2002, 58).

Afai ua e solia tulafono a le Atua po o au feagaiga, e mafai ona e salamo. O le Togiola, na totogiina ai e Iesu Keriso le tau mo au agasala, ma o le a faamagaloina oe e le Atua. A maea lelei ona e salamo ma le faamaoni, e le moomia ona e nofonofa ai pea i au soligatulafono ua mavae. O le poloaiga a le Alii ina ia “faamagalo atu i tagata uma” o loo aofia ai ma le tulaga manaomia o lou faamagaloina o lou lava tagata (tagai MFF 64:10).

O se malamalamaaga i upumoni faavavau o se uunaiga mamana lea mo amioga amiotonu. E sili atu ona tautuaina oe e ala lea i le tausisi atu i mea na o loo mafai ona e malamalama nei i ai ma puleaina, ae le o le maumauina o le malosi po o le faateleina o le le mautonu i le popole lea i mea e lei faaalua atoatoa mai e le Atua. Ia taulai atu i le ola ai i upumoni faigofie o le talalelei a Iesu Keriso. O le tosina atu i le itupa tutusa e mafai ona matuai malosi lava, ae o le faatuatua i le Togiola e mafai ai ona e mauaina le mana e tetee atu ai i amioga le tatau, ia tausia lou olaga ia saoloto ai le agasala.

Faatumuina Lou Olaga i le Lelei



Na saunoa ma le atamai se tasi e faapea afai tatou te totoina se togalaaui i ni fatu lelei, o le a le tele le manaomia o se sua eleele. E faapena foi, afai tatou te faatumuina o tatou olaga i le tausiga faaleagaga ua saunia e le Atua, e mafai ona sili atu ona tatou puleaina o tatou faanaunauga ma avea ai i tatou ma matai i o tatou lava tagata. O lona uiga o lenei mea o le faia lea o se siosiomaga lelei faaleagaga i aso taitasi lea e mafai ai e le Agaga ona lauolaola ma aloese mai siosiomaga o faaososoga, lea e faatiga ai le Agaga. O se siosiomaga lelei e aofia ai tapuaiga faifaipea e patino i le tagata lava ia ma faalauaitele, auai

i le lotu, anapogi, auai i le malumalu, auaua atu, faitauina o tusitusiga paia, tatalo, fegalegaleai ma uo lelei, ma le faitau ma faalogologo i tusi ma musika e faagaetia ai. A o siomia oe i nei mea, o le a fua mai lau faatoaga i ni fua lelei ma avea ma se olioliga ia te oe ma lou Tama o i le Lagi. O le fiafia e selesele mai le faafaileleina o mea e aoga, ae le na o le puleaina o mea na e faaonono i le Atua.

O se tasi auala taua e faatumulia ai lou faatoaga faaleagaga i fatu lelei o le matuai toaga lea i le Ekalesia. E ui o le tosina i le itupa e tasi e mafai ona faaauau pea ma e mafai ona tutupu mai ai ni feteenaiga e le foiaina, ae o le a faamalosia pea oe i le auaua atu i le Ekalesia ma le fegalegaleai faatasi ma isi tagata o le Ekalesia o e o loo fefaasoai talitonuga ma osia feagaiga e tasi ia na e osiaina. O le taumafa i le faamanatuga, usuina o

viiga o Siona, ma le faalogologo i tautalaga faagaetia e tofusao uma lava i lou tuputupuae faaleagaga. O le le amanaiaina o nei aafiaga lelei ma aluese mai le Ekalesia ona o le lotovai-vai, o le manatu ua teenaina, po o se lagona faapea e te le auai i ai e mafai ona le gata e faamanualia ai oe faaleagaga ae o lou naunau e pulea au mea e fai.

O nisi tagata o loo tosina atu i le itupa tutusa ua lagona le teenaina ona e seasea ona faaalua atu e tagata o le Ekalesia le alofa. E leai se tagata o le Ekalesia e tataua ona faailoga tagata. A o e faaali atu le alofa ma le agalelei i isi, ua e tuuina atu ia i latou se avanoa e suia ai o latou uiga ma mulimuli atoatoa ai ia Keriso.

E faaopoopo atu i le faatumuina o lou togalaau i aafiaga lelei, e tataua foi ona e aloese mai soo se aafiaga e mafai ona faaleagaina ai oe faaleagaga. O se tasi o nei aafiaga faatiapoloa o le faananaui lea po o le taulai atu i mafauauga ma lagona o le itupa tutusa. E le fesoasoani i ai le faaalua o ni naunauga faatauatane po o le avea ma mataupu e le talafeagai ona matauina pe talanoaina. E sili atu ona lelei le filifili o ni uo o e latou te le faailoaina atu faalauaitele o latou lagona faatauatane. O le filifili faaeteete o uo ma faufautua o e o loo taulamua i ni olaga lelei ma amiotonu o se tasi lea o laasaga taua i le avea ma se tagata aoga ma mama. O le fegalegaleai ma i latou o le itupa e tasi o se mea e masani ai ma e manaomia, pe afai lea e te faataatitiaina ia ni tuaoi atamamai e aloese ai mai ni lagona tosina le lelei ma le le manuia, lea e mafai lava ona tau atu ai i ni sootaga faaletino ma feusuaiga. O loo i ai se tulaga matautia o le matuai mafana o se mafutaga ma se uo o le itupa e tasi lea e mafai ona tau atu ai i ni fegalegaleaiga ia ua tausalaina e le Alii. O a tatou fegalegaleaiga sili ona taua o loo i ai lea i o tatou lava aiga aua o o tatou sootaga ma i latou e mafai ona faavavau.

O le faanoanoa o le isi aafiaga faatiapoloa. E masani ona maua ona o le le lava o le malamalama ma le le talitonu i le alofa faifaipea o le Atua e pei ona auala mai i le mana o le Togiola. E mafai ona e maua le faamoemoe i le mea moni faapea o faamanuiaga uma na fuafuaina i le fuafuaga o le fiafia a le Tama Faalelagi o loo avanoa pea mo Ana fanau taitoatasi. O le faanoanoa ma le masalosalo e mafai ona tau atu ai i le alu-ese, saili sese, ma le le onosai e faapea o tali ma faaiuga uma i faafitauli o le olaga e le vave ona oo mai. O le Agaga o le Atua e aumaia lagona lelei ma le fiafia. Faatuatua i le Alii. Aua e te tuuaia soo se tasi—o lou tagata, o ou matua, o le Atua—mo faafitauli e le malamalama atoatoa i ai i lenei olaga.

O le ponokalafi, i ona ituaiga uma faatamai ma le taufaasese, o se aafiaga faatiapoloa tulagaese lea le matautia, ma le faotosina. O ata e oo atu i lou mafaufau, e tusa lava pe mo na o sina taimi puupuu, e pueina uma lava ma o le a aliae mai i se taimi o vaivaiga ina ia faavaivaia ai lau faaiuga. O gaoioiga amiotonu e mafua mai mafaufauga mama, lea e uunaia e tusi, talanoaga, musika, ma isi ala o faasalalauga faagaetia.

O nisi tagata sa sauaina i popofou o le olaga pe sa faaitaitaia foi ni faiga feusuai a o laiti. Afai na tupu lenei mea ia te oe, faamolemole ia e malamalama o le sauaina e isi po o ni mea na tutupu a o laiti e le tatau ona tupu ai fua se lagona tausalaina, le agavaa, po o le teenaina e le Atua po o Lana Ekalesia i le taimi nei. O le amioga sese na faia ma le le mafaufau i ai i popofou o le olaga o le a le aafia ai fua se talavou i le tosina atu i le itupa tutusa i le aveai ma se tagata matua.

O le a sili atu ona faamanuiaina oe i le puleaina o lou olaga a o e tausiana pea lava lou agaga. O le le 'ai i meaai mo se taimi umi, ae sosoo ai ma le taumafaina o ni meaai se tele, o le a le tausisia ai le soifua maloloina faaletino. E faapena foi, o le fafagaina faavaitaimi o lou agaga, e tusa lava po o ni tufaaga lapopoa, o le a le maua ai le taunuuga lava e tasi lea e maua mai i le faafaileleina pea lava pea i aso taitasi o lou agaga.



“Agai i Luma”

Ua folafola mai e Peresitene Gordon B. Hinckley faapea o i latou o e o loo i ai le tosina atu i le itupa tutusa e le o faalia nei faanaunauga e mafai ai ona “agai atu i luma e pei o isi tagata o le Ekalesia” (“O A Mea o Tuufesili ai Tagata e Uiga Ia i Tatou?” *Liahona*, Ian. 1999, 83). Afai e te ola i faatulagaga ua faatuina e le Atua ma faatumuina ou aso i mea aoga, o le a tumu lou olaga i le faamoemoe ma e mafai ona e faamoemoeina ni avanoa mo se auaunaga tauaogaina, aafia i ni gaioiga e fegalegaleai ai, ma le tuputupuae faaleagaga i lenei olaga.

E fesoasoani tele le feiloai atu i lou epikopo ma isi taitai perisitua o e o loo umia ki o fautuaga musuia mo tagata o lau iunite faaleEkalesia i le lotoifale. Afai e te alu atu ia i latou ma le faamaulalo ma le faamaoni, o le a latou aapa mai i le agalelei ma le alofa a o latou fefautuaai faatasi ma oe. Na saunoa le Au Peresitene Sili: “Matou te uunaia taitai o le Ekalesia ma tagata o le Ekalesia ina ia aapa atu i le alofa ma le malamalama ia i latou o loo tauivi ma nei mataupu. E toatele o le a tali mai i le alofa faaKeriso ma fautuaga musuia” (tusi, Nov. 14, 1991). E masani foi ona fesoasoani tele le sailia o le taitaiga mai faufautua faapolofesa o e ua malamalama lelei i le galulue ai ma mataupu o le tosina atu i le itupa tutusa ma o a latou fautuaga e ogatasi ma aoaogo o le talalelei.

A o e sailia le fesoasoani a isi, ia faaeteete ina ia aua ne’i e faalagolago tele atu na o i latou mo lou malosiaga faaleagaga. E mafai e lou epikopo ma isi taitai ona fautuaina oe ma aoaoina oe i mataupu faavae moni o le fuafuaga a le Atua mo Lana fanau, ae o le tumutumuga lava o le malosiaga e manaomia e lagolagoina oe e tatau ona sau mai le Alii a o e gauai atu i aafiaga a le Agaga Paia ma faatinoina le faatuatua ia Iesu Keriso. Ona faatoa maua lea o se tali mausali faapea le malosiaga ua

lava ma totoe e aluese ai mai amioga ma mafaufauga e le fiafia i ai le Atua.

E toatele se aofaiga o le Au Paia o Aso e Gata Ai o loo tosina atu i le itupa tutusa ua agai i luma i o latou olaga e ala lea i le usitaia o faatulagaga o le talalelei, latalata i le Alii, ma le mauaina o le fesoasoaniga faalelotu ma faapolofesa pe a manaomia. Ua faatamaoagaina ma faamalieina o latou olaga, ma e mafai ona latou mautinoa o faamanuiaga uma o le ola faavavau o le a maua e i latou.

O aoaoga o le talalelei e matuai eseese lava mai auala ma aoaoga a le lalolagi i le tele o mataupu, e aofia ai amioga mama. O nei eseese e mafua mai i lo tatou malamalama i le meaalofa o le ola faavavau lea ua saunia e le Tama Faalelagi mo i tatou faapea ma aiaiga e moomia ina ia mauaina ai. E leai se tasi o le a tuliese, pe o le a mafai foi ona tuliese mai le li'o o le alofa o le Atua po o le valaaulia a Lana Ekalesia, aua o i tatou uma o Ona atalii ma afafine faapelepele. E pei ona saunoa Peresitene Hinckley: "Matou te alolofa ia i latou o e ua tauivi ma lagona o le naunau mo le tane i le tane po o le tamaitai i le tamaitai. Matou te tatalo i le Alii mo outou, matou te alolofa ia te outou, matou te manatu ia te outou o o matou uso ma tuafafine" ("Ia Tu Malosi e Tetee Atu i Togafiti a le Lalolagi," *Liahona*, Ian. 1996, 120).

○ LE EKALESTIA A
IESU KERISO
○ LE AU PAIA ○ ASO
E GATA AI

© 2007 Intellectual Reserve, Inc.
Ua taofia aia tatau uma
Lolomi i le lunaite Setete o Amerika
Faamaonia le faaPeretania: 4/07
Faamaonia le faaliliuga: 4/07
Faaliliuga o le *God Loveth His Children*

